



REPUBLIKA E SHQIPËRISË

KOMISIONI I PAVARUR I KUALIFIKIMIT

RREGULLORE
PËR PARANDALIMIN E KONFLIKTIT TË INTERESAVE, SI DHE DEKLARIMIN
E PASURIVE NË USHTRIMIN E FUNKSIONEVE PUBLIKE NË
KOMISIONIN E PAVARUR TË KUALIFIKIMIT

Tiranë, më 18.11.2019

KREU I RREGULLA TË PËRGJITHSHME

Neni 1

Baza ligjore

Rregullorja “Për parandalimin e konfliktit të interesave, si dhe deklarimin e pasurive në ushtrimin e funksioneve publike në Komisionin e Pavarur të Kualifikimet”, bazohet në nenin 46, të ligjit nr. 9367, datë 7.4.2005, “Për parandalimin e konfliktit të interesave në ushtrimin e funksioneve publike”, i ndryshuar (ligji nr. 9367/2005), në ligjin nr. 9049, datë 10.4.2003, “Për deklarimin dhe kontrollin e pasurive, të detyrimeve financiare të të zgjedhurve dhe të disa nëpunësve publikë”, i ndryshuar (ligji nr. 9049/2003), dhe në nenin 27, të ligjit nr. 84/2016, “Për rivlerësimin kalimtar të gjyqtarëve dhe prokurorëve në Republikën e Shqipërisë” .

Neni 2

Qëllimi

Qëllimi i kësaj rregulloreje është garantimi i një vendimmarrjeje të paanshme, transparente, në interesin më të mirë të mundshëm të publikut nga zyrtarët e Komisionit të Pavarur të Kualifikimit.

Neni 3

Objekti

Objekti i kësaj rregulloreje është përcaktimi i rregullave, mjeteve, mënyrave, procedurave, përgjegjësive dhe kompetencave për identifikimin, deklarimin, regjistrimin, trajtimin, zgjidhjen dhe masave ndëshkuese e rasteve të konfliktit të interesave.

Neni 4

Përkufizime

1. “Zyrtar” është çdo person që kryen detyra dhe ushtron funksione publike në KPK.
2. “Epror i një zyrtari” është një zyrtar tjetër, një njësi organizative brenda institucionit publik, drejtuesi më i lartë i institucionit publik ose një organ i këtij institucioni, që ka kompetenca emëruese, drejtuese, urdhëruese, vlerësuese ose kontrolluese, të drejtpërdrejta mbi këtë zyrtar, ose që i janë dhënë kompetenca të caktuara për zbatimin e këtij ligji.
3. “Person i lidhur me një zyrtar” është çdo person fizik ose juridik, i cili rezulton të ketë pasur ose të ketë lidhje interesi, pasurore ose vetjake jo pasurore me zyrtarin, sipas pikës 11, të nenit 3, të ligjit nr. 9367/2005.
4. “Parim i proporcionalitetit”, sipas pikës 12, të nenit 3 dhe të nenit 46, të ligjit nr. 9367/2005, është raporti ndërmjet rëndësisë së detyrave, përgjegjësive dhe kompetencave të një zyrtari, me masat për parandalimin e konfliktit të interesave, raport në të cilin sa më të rëndësishme të jenë detyrat, përgjegjësitë dhe/ose kompetencat e tij, aq më të shumta janë kufizimet e interesave vetjake.

Neni 5

Fusha e zbatimit

1. Rregullorja përcakton norma të detyrueshme për t'u zbatuar nga:
 - a. çdo zyrtar i KPK-së, që ndodhet në pozicione, ka përgjegjësi, kryen detyra ose ushtron kompetenca të llojeve konkrete të përcaktuara shprehimisht në ligjin nr. 84/2016, në ligjin nr. 9367/2005, dhe në ligjin nr. 9049/2003;
 - b. çdo zyrtar tjetër i KPK-së, i cili ka kompetencë thelbësore dhe përcaktuese në një vendimmarrje, duke përfshirë çastet paraprake dhe çastin e fundit të procesit vendimmarrës;
 - ç. çdo person të lidhur në masën dhe mënyrën e përcaktuar në ligjin nr. 9367/2005 dhe në nenin 30 të Kodit të Procedurave Administrative.
2. Anëtari i KPK-së, këshilltari ligjor, këshilltari ekonomik dhe çdo zyrtar tjetër i KPK-së mbart detyrimin për të garantuar paanësinë, duke deklaruar dhe shmangur çdo situatë konflikti interesi, sipas përcaktimeve të nenit 27 të ligjit nr. 84/2016, të ligjit nr. 9367/2005 dhe të ligjit nr. 9049/2003.
3. Rregullorja nuk zbatohet për proceset gjyqësore, sipas rastit për juridiksion rivlerësimi apo disiplinor, brenda të cilëve, identifikimi dhe regjistrimi i interesave kryhen sipas rregullave përkatëse procedurale. Identifikimi dhe regjistrimi i interesave, sipas kësaj rregulloreje, bëhet vetëm për ato veprime që kryhen para dhe jashtë procesit gjyqësor.

Neni 6

Çastet paraprake të vendimmarrjes

Për qëllimet e kësaj rregulloreje:

- a. vendimmarrje për një akt do të vlerësohet, në çdo rast, çasti i fundit i procesit vendimmarrës, gjatë të cilit vendoset përmbajtja përfundimtare e aktit;
- b. vendimmarrje për një akt do të vlerësohen edhe ato çaste paraprake të vendimmarrjes, sipas germës “a” të kësaj pike, të cilat janë thelbësisht të rëndësishme dhe përcaktuese për përmbajtjen përfundimtare të aktit, që përfshijnë, por nuk janë të kufizuara si më poshtë:
 - i. hartimin e projektaktit nga zyrtari ose zyrtarët dhe dorëzimin organit apo zyrtarit kompetent për vendimmarrje;
 - ii. dhënien e komenteve, mendimeve, sugjerimeve e çdo kontributi tjetër të dokumentuara për këtë projektakt nga zyrtarë të tjerë, brenda apo jashtë institucionit;
 - iii. dhënien e komenteve, mendimeve, sugjerimeve e çdo kontributi tjetër të dokumentuara nga çdo zyrtar si pasojë e kërkesave, pretendimeve apo informacioneve të subjekteve të interesuara për këtë projektakt;
 - iv. dhënien e komenteve, mendimeve, sugjerimeve e çdo kontributi tjetër të dokumentuara të çdo zyrtari me kompetencë për të vendosur përfundimisht për aktin;
 - v. përfshirjen e çdo dokumenti paraprak, ndërmjetës dhe/ose shoqërues të një vendimmarrjeje për një akt ose kontratë që lidhet kryesisht me organizimin, të ardhurat, shpenzimet, strategjitë, burimet njerëzore, funksionet, detyrat e përgjegjësitë administrative pa praninë e të cilëve nuk do të vendosej dhe mbështetej përmbajtja përfundimtare e projektaktit ose projekt-kontratës në tërësinë e tyre;
 - vi. çdo rast tjetër në përputhje me specifikat konkrete dhe përkatëse të misionit dhe të veprimtarisë së KPK-së.

Neni 7

Kompetenca thelbësore dhe përcaktuese për një akt

1. Një zyrtar i KPK-së ka kompetencë thelbësore dhe përcaktuese për një akt, nëse pjesëmarrja, ndikimi dhe qëndrimi i tij në vendimmarrjen për këtë akt, sipas nenit 6 të kësaj rregulloreje, përcaktojnë përmbajtjen e aktit.

2. Si kompetencë thelbësore dhe përcaktuese e një zyrtari për një akt, përfshihet, në secilin nga çastet paraprake të mësipërme të vendimmarrjes, mundësia për të ndikuar mbi vendimmarrjen që buron nga:

a. roli zyrtar urdhërues, propozues, këshillues, zbatues ose kontrollues i ushtruar, që rrjedh nga pjesëmarrja, ndikimi dhe qëndrimi në përgatitjen, negocimin, propozimin, këshillimin, miratimin, administrimin, kontrollin ose ekzekutimin e një akti apo kontrate;

b. çdo shkak tjetër në përputhje me specifikat konkrete e përkatëse të funksionit e të veprimtarisë së zyrtarëve të KPK-së.

3. Pavarësisht nga përcaktimet e pikave të mësipërme të kësaj rregulloreje, përbën çast paraprak të vendimmarrjes apo kompetencë thelbësore e përcaktuese për një akt ose kontratë, çdo rast i vlerësuar si i tillë nga autoriteti përgjegjës i KPK-së, i emëruar si i tillë me urdhër të posaçëm të Kryetarit të KPK-së.

4. Në secilin prej çasteve të mësipërme, zyrtari, pjesëmarrës në vendimmarrje, me kompetencë thelbësore dhe përcaktuese, është i detyruar të deklarojë, në zbatim të pikës 1, të nenit 7, të ligjit nr. 9367/2005, nëse ka një interes privat që mund të shkaktojë rënien në konflikt interesi të çfarëdo lloji.

5. Në të njëjtat raste, eprori mund t'i kërkojë zyrtarit të deklarojë rast pas rasti interesat private në zbatim të pikës 2, të nenit 7, të ligjit nr. 9367/2005.

6. Kur vlerësohet se ka rrezik për rënien në konflikt interesi të zyrtarit, vepohet sipas nenit 37, të ligjit nr. 9367/2005 dhe të neneve 16 dhe 27, të ligjit nr. 84/2016.

Neni 8

Interesat private

1. Interesat private të një zyrtari janë ato interesa që parashikohen në nenin 5, të ligjit nr. 9367/2005, dhe konkretisht:

a. të drejta dhe detyrime pasurore të çdo lloj natyre;

b. çdo marrëdhënie tjetër juridiko-civile;

c. dhurata, premtime, favore, trajtime preferenciale;

ç. negocime të mundshme për punësim në të ardhmen nga ana e zyrtarit gjatë ushtrimit të funksionit apo negocime për çdo lloj forme tjetër marrëdhëniesh me interes privat për zyrtarin, pas lënies së detyrës, të kryer nga ai gjatë ushtrimit të detyrës;

d. angazhime në veprimtari private me qëllim fitimi ose çdo lloj veprimtarie, që krijon të ardhura, si dhe angazhime në organizata fitimprurëse dhe jofitimprurëse, sindikata ose organizata profesionale, politike, shtetërore dhe çdo organizatë tjetër;

dh. marrëdhënie:

i. familjare apo të bashkëjetesës;

ii. të komunitetit;

iii. etnike;

iv. fetare;

v. të njohura të miqësisë apo të armiqësisë;
e. angazhime të mëparshme, nga të cilat kanë buruar ose burojnë interesa të përmendur në shkronjat e mësipërme të këtij neni.

2. Kufizimet e interesave privatë, të përcaktuara shprehimisht në ligjin nr. 9367/2005, zbatohen së bashku me kufizimet e të njëjtit interes privat, të përcaktuara shprehimisht në një ligj tjetër, sipas parimit që zbatohet ai kufizim që është më i rreptë. Kufizimet e interesave privatë për parandalimin e rasteve të veçanta të konfliktit të vazhdueshëm të interesave (rastet e papajtueshmërisë), nuk shterohen vetëm nga ligji nr. 9367/2005.

3. Nëse në ligjin nr. 9367/2005, në lidhje me një interes të caktuar privat të një zyrtari, nuk është përcaktuar ndonjë kufi sasior i kufizimit të këtij interesi, ndërsa në një ligj tjetër i njëjti interes, me qëllim parandalimin e konfliktit të interesave, kufizohet shprehimisht sipas një kufiri sasior, atëherë ky kufizim zbatohet edhe për kriteret e përcaktuar në ligjin nr. 9367/2005, dhe anasjelltas.

4. Vlerësohet shkak për lindjen e konfliktit të interesit, jo vetëm çdo lloj interesi privat i zyrtarit nga ata të përcaktuar në nenin 5, të ligjit nr. 9367/2005, por dhe kufizimet e interesave private të përcaktuara në ligjet e tjera mbi të cilat ushtron veprimtarinë KPK-ja, çdo lidhje apo gërshetim ndërmjet dy a më shumë prej tyre, nëse për shkak të këtij interesi, ose për shkak të daljes jashtë kufizimeve të detyrueshme të këtij interesi, shfaqet një gjendje me konflikt interesi, sipas përkufizimeve të pikave 1 dhe 4, të nenit 3, të ligjit nr. 9367/2005, apo gjendemi para rasteve të papajtueshmërisë së funksionit të parashikuar në ligje të tjera.

KREU II

PROCEDURAT DHE MJETET PËR IDENTIFIKIMIN DHE REGJISTRIMIN E KONFLIKTEVE RAST PAS RASTI TË INTERESAVE

Seksioni 1

Identifikimi dhe regjistrimi i interesave në kushtet e konflikteve rast për rast të interesave

Neni 9

Deklarimi rast për rast i interesave privatë të zyrtarit

1. Çdo zyrtar i KPK-së, sipas përcaktimit të këtij termi në pikat 1 dhe 2, të nenit 4, të kësaj rregulloreje, që përgatit raportet për kontroll të plotë në verifikimin e deklaratave të interesave private periodike të subjekteve të ILDKPKI-së, që mbikëqyrin ose përdorin fonde publike, që lidhin kontrata shërbimi, investimi, që përfaqësojnë KPK-në në marrëdhënie me të tretët, në ushtrimin e kompetencave ose në kryerjen e detyrave të tyre funksionale ose të ngarkuara përkohësisht, detyrohet të bëjë vetëdeklarim paraprak, rast për rast, të ekzistencës së interesit të tij privat, që mund të bëhet shkak për lindjen e konfliktit të interesit.

2. Deklarimi rast për rast i interesave private të zyrtarit bëhet çdo herë, kur kjo kërkohet nga organi epror.

3. Deklarimi, si rregull duhet kërkuar dhe bërë paraprakisht. Kur kjo nuk është e mundur ose kur nuk ka ndodhur, deklarimi kërkohet dhe bëhet sa më shpejt të jetë e mundur.

4. Vetëdeklarimi ose deklarimi me kërkesë bëhet me shkrim, kur zyrtari ose punonjësi përfshihet në një vendimmarrje për një akt.

5. Komiteti *ad hoc*, në bazë të vetëdeklarimit të zyrtarit të KPK-së, si dhe në bazë të të dhënave që ka, merr masat e nevojshme që të shmangë emërimin e një zyrtari në pozicione, në të cilat mund të lindin ose ka konflikte interesash. KPK-ja merr masa që zyrtarit të mos t'i ngarkohen detyra që mund të çojnë në shfaqjen e një konflikti të mundshëm interesash dhe në rast të kundërt merr masa për largimin e zyrtarit nga detyra.

Neni 10

Identifikimi i interesave privatë të zyrtarit nga persona të tretë

1. Ofrimi i informacionit për interesat privatë të zyrtarit në KPK-së është:
 - a. detyrë e çdo zyrtari që ka dijani;
 - b. e drejtë e palëve të interesuara dhe e çdo personi që ka dijani dhe që ka një interes në përgjithësi, dhe që përputhet me qëllimin e ligjit nr. 9367/2005.
2. Burime të tjera informacioni për interesat privatë të një zyrtari mund të jenë edhe ato burime të parashikuara në nenin 9, të ligjit nr. 9367/2005.

Neni 11

Lëshimi i autorizimit nga zyrtari i KPK-së

1. KPK-ja vë në dispozicion të zyrtarëve të tij modelin e autorizimit, në formën dhe në përmbajtjen që këta duhet të lëshojnë.
2. Autorizimi dorëzohet në autoritetin përgjegjës të KPK-së, i cili e administron atë gjatë gjithë periudhës që zyrtari është në marrëdhënie pune në institucion.

Neni 12

Autoriteti përgjegjës për parandalimin, kontrollin dhe zgjidhjen e gjendjeve të konfliktit të interesave

1. Autoriteti qendror përgjegjës për zbatimin e këtij ligji është Inspektorati i Lartë i Deklarimit dhe Kontrollit të Pasurive dhe Konfliktit të Interesave (ILDKPKI).
2. Autoriteti ose strukturat përgjegjëse për zbatimin e ligjit nr. 9367/2005 dhe të kësaj rregulloreje, sipas hierarkisë janë:
 - a. Kryetari i KPK-së;
 - b. Komisionerët;
 - c. Komiteti *ad-hoc*
 - ç. Sekretari i Përgjithshëm;
 - d. Drejtori i Menaxhimit të Çështjeve dhe Marrëdhënieve me Median dhe Publikun;
 - e. Drejtori i Drejtorisë Ekonomike dhe e Shërbimeve Mbështetëse;
 - f. Autoriteti Përgjegjës.
3. Autoriteti Përgjegjës në KPK, i cili zbaton detyrat e përcaktuara në ligjin nr. 9367/2005 dhe në nenin 13 të kësaj rregulloreje, ngrihet me Urdhër të Kryetarit të KPK-së.
4. Në përshkrimin e pozicionit të punës, për detyrën e Autoritetit Përgjegjës të KPK-së, të vendoset si kriter edhe njohja e ligjeve për deklarimin e pasurive dhe ligjit për parandalimin e konfliktit të interesit. Për emërimin, lëvizjen apo largimin nga funksioni të Autoritetit Përgjegjës, njoftohet paraprakisht Inspektori i Përgjithshëm i ILDKPKI-së.

Neni 13

Detyrat e autoritetit përgjegjës në KPK

1. Autoriteti Përgjegjës në KPK kryen detyrat sipas udhëzimit nr. 1, datë 27.6.2014, "Për krijimin, funksionimin dhe përgjegjësitë e strukturave të autoriteteve përgjegjëse për parandalimin e konfliktit të interesave, në institucionet publike" (udhëzimi nr. 1/2014) të Inspektorit të Përgjithshëm ILDKPKI-së, si dhe çdo detyrë tjetër sipas parashikimeve të ligjit nr. 9367/2005 dhe nr. 9049/2003, dhe çdo akti nënligjor të miratuar në zbatim të tyre.

2. Autoriteti Përgjegjës kryen veçanërisht këto detyra:

- a. mbledh dhe dokumenton interesat privatë të zyrtarëve të KPK-së;
- b. shpërndan dhe mbledh autorizimet e detyrueshme për t'u lëshuar nga zyrtarët e KPK-së, sipas nenit 10, të ligjit nr. 9367/2005, dhe nenit 11 të kësaj rregulloreje;
- c. krijon regjistrin përkatës dhe mban regjistrimet rast për rast të konfliktit të interesit;
- ç. bazuar në regjistrimin dhe vlerësimin e interesave private të zyrtarëve të KPK-së u sugjeron atyre dhe/ose eprorëve të tyre çështjet dhe momentet kur zyrtarët, dhe/ose eprorët e tyre duhet të tregohen të kujdesshëm për parandalimin e:
 - i. konfliktit rast për rast të interesit (faktik, në dukje dhe të mundshëm);
 - ii. konfliktit të vazhdueshëm të interesit;
- d. kryen me autorizim të Kryetarit të KPK-së, verifikim të interesave të deklaruara apo të padeklaruara të zyrtarëve dhe punonjësve të këtij institucioni, duke shfrytëzuar të gjitha mundësitë që i jep ligji, dhe informon për këtë, sipas rastit, Kryetarin e KPK-së;
 - dh. mbështet eprorin e zyrtarit në vlerësimin e kryerjes së padrejtë të detyrave për shkak të konfliktit të interesit, në marrjen e masave disiplinore apo në propozimin për vendosjen e gjobave në rast kundërvajtjesh administrative të zyrtarit, në kuptim të ligjit nr. 9367/2005;
- e. përgatit guida, informon, këshillon e trajnon zyrtarët në lidhje me këtë ligj, me të drejtat e detyrimit e tyre dhe me parandalimin e konfliktit të interesave;
- ë. merr masa për të siguruar aksesin dhe informimin e publikut në të dhënat personale të zyrtarëve, dhe në dokumentet e tjera zyrtare që lidhen me konfliktin e interesit, duke u bashkërenduar me strukturën përgjegjëse për të drejtën e informimit dhe mbrojtjes së të dhënave personale;
- f. në bashkëpunim me Drejtorinë e Menaxhimit të Çështjeve dhe Marrëdhënieve me Median dhe Publikun dhe Drejtorinë Ekonomike dhe të Shërbimeve Mbështetëse, marrin masa për të lehtësuar ankimin administrativ të palëve të interesuara në lidhje me aktet e marra në konflikt interesi, zyrtarëve përgjegjës, si dhe mbështesin KPK-në në ndërmarrjen e hapave ligjore për dëmshpërblimin e palëve të treta të dëmtuara dhe kalimin e barrës së dëmshpërblimit që zyrtarët përgjegjës të:
 - i. orientojnë, vlerësojnë, kontrollojnë apo kryejnë hetim administrativ në lidhje me konfliktin e interesit të zyrtarëve të KPK-së, në përputhje me ligjin kuadër, këtë rregullore dhe urdhrat e miratuara nga ILDKPKI-ja;
 - ii. shtrojnë çështje dhe kërkojnë këshilla nga ILDKPKI-ja për zbatimin e këtij ligji, si dhe për përmirësime në ligje të tjera kur kjo ka të bëjë me çështjen e konfliktit të interesave;
 - iii. marrin masa për të miratuar në rregulloret e brendshme;
- g. mbështet KPK-në në kryerjen e deklaramit periodik të interesave nga zyrtarët e KPK-së;

gj. bën me dije zyrtarët dhe punonjësit e KPK-së për çdo këshillë apo udhëzim të ILDKPKI-së;

h. mbështet misionet monitoruese, vlerësuese apo të verifikimit dhe të hetimit administrativ të KPK-së për zyrtarët e këtij institucioni;

i. ndjek dhe zbaton detyra të tjera që i ngarkohen sipas kësaj rregulloreje ose urdhrave nga Kryetari i KPK-së.

Neni 14

Regjistri i konflikteve të interesave rast pas rasti

1. Për regjistrimet e konflikteve të interesave rast për rast të zyrtarëve të KPK-së, krijohet regjistri me të njëjtin emër.

2. Regjistri i konflikteve rast për rast të interesave administrohet nga autoriteti përgjegjës i KPK-së.

Neni 15

Regjistrimet rast pas rasti të konflikteve të interesave

Autoriteti përgjegjës, për çdo rast të shfaqjes së një konflikti rast për rast të interesit, regjistron identitetin e zyrtarit të KPK-së, interesat privatë të tij, shkak për konflikt interesi, thelbin e konfliktit, palët e interesuara, burimin e të dhënave, mënyrën e marrjes dhe të verifikimit të tyre, si dhe vendimin që është marrë, mbështetur në këto të dhëna, përfshirë edhe vendimet e marra nga eprorët, institucionet eprorë ose nga gjykatat.

Seksioni 2

Identifikimi, regjistrimi, kufizimi i interesave privatë

Neni 16

Zyrtarët që mbartin detyrimin për deklaram periodik të interesave private

1. Deklarimi i interesave private periodike të zyrtarëve të KPK-së bëhet në përputhje me kërkesat e ligjit nr. 9367/2005 dhe të ligjit nr. 9049/2003.

2. Zyrtarët e KPK-së, të cilët janë të detyruar të bëjnë deklarime periodike të interesave private sipas nenit 3, të ligjit nr. 9049/2003, janë:

- a. Kryetari i KPK-së;
- b. Komisionerët;
- c. Këshilltarët Ligjorë;
- ç. Këshilltarët Ekonomikë
- d. Sekretari i Përgjithshëm;

3. Në përputhje me nenet 21 dhe 22, të ligjit nr. 9049/2003, mbartin detyrim për deklaram të interesave private periodike bashkëshorti/ja, bashkëjetuesi/ja dhe fëmijët madhorë të zyrtarëve të KPK-së, të përcaktuar në pikën 2 të këtij neni, edhe kur këta të fundit nuk janë në të njëjtën gjendje familjare me zyrtarin.

4. Çdo zyrtar i KPK-së, i përcaktuar në pikën 2 të këtij neni, në rast largimi nga funksioni dhe në rast se nuk është më subjekt i deklaramit të interesave privatë periodikë në KPK-së, ose kur kalon në një pozicion që nuk mbart detyrimin për deklaram, është i detyruar, që brenda 15 ditëve nga data e largimit nga funksioni, të plotësojë dokumentin zyrtar

“Deklaratë pas largimit nga funksioni”. Drejtoria Ekonomike dhe e Shërbimeve Mbështetëse nuk mund të bëjnë dorëzimin e librezës së punës, të librezës së kontributeve shoqërore, të çdo dokumenti tjetër, si dhe pagimin e pagës së fundit dhe/ose shpërblimeve që mund t’i takojnë zyrtarit, në rast se ky i fundit nuk plotëson këtë detyrim ligjor.

Neni 17

Mbrojtja për dhënien e informacioneve

1. Çdo shtetas, i cili ofron informacion të bazuar për rastet e konfliktit të interesave të padeklaruara nga zyrtarët e KPK-së, përfiton mbrojtje të veçantë administrative, si më poshtë:

a. zyrtari i KPK-së, për të cilin jepet informacion, nuk mund të ushtrojë asnjë kompetencë administrative me efekte ndëshkuese mbi shtetasin informues qoftë ky dhe subjekt i KPK-së, dhe as të bëhet pengesë për fitimin e të drejtave të ligjshme nga ky i fundit për shkak të dhënies së informacionit;

b. kur marrja e masës ndaj shtetasit që informon përcaktohet nga një shkak tjetër ligjor, ajo merret vetëm nga një zyrtar tjetër i KPK-së, që qëndron në marrëdhënie varësie vertikale mbi zyrtarin, për të cilin është dhënë informacioni.

2. Nga parashikimi i pikës 1, të germës “b” të këtij neni bën përjashtim rasti kur marrja e masës administrative bëhet në kushtet kur konflikti i vetëm i interesit i pashmangshëm i zyrtarit të KPK-së është ai në dukje kur plotësohen kushtet e mëposhtme:

a. kur zyrtari i KPK-së është i pazëvendësueshëm në ushtrimin e funksioneve;

b. kur vetëpërjashtimi i zyrtarit është i pamundur, sepse është e pamundur delegimi i kompetencave të tij te një zyrtar tjetër, për shkak të ligjit apo për shkak të situatës;

c. kur vendimet e zyrtarit të KPK-së, sipas rregullimeve me ligj, nuk i nënshtrohen miratimit, revokimit ose shfuqizimit nga një organ epror;

d. kur nuk është i mundur transferimi a tjetërsimi i interesit privat, për shkak të natyrës së tij (si lidhje familjare, komunitare apo lidhje të tjera);

e. kur nuk ka kuptim që për një rast konflikti të tillë, zyrtari i KPK-së të japë detyrimisht dorëheqjen nga funksioni.

Neni 18

Kufizimi i interesave privatë për parandalimin e konfliktit rast për rast të interesit për çështje të veçanta

1. Kryetari i KPK-së, Komisionerët, këshilltarët ligjorë dhe këshilltarët ekonomikë:

a. nuk mund të ushtrojnë asnjë funksion tjetër publik;

b. nuk mund të ushtrojnë asnjë veprimtari tjetër fitimprurëse, me përjashtim të mësimdhënies, akademike dhe shkencore, duke përfshirë në të, shkrimin, analizën, studimin, publikimin, apo dhënie leksionesh dhe kryerje trajnimesh, për çështje ligjore, si dhe të marrë pjesë në veprimtari që lidhen më çështje ligjore, administrimin e drejtësisë dhe çështje të tjera të lidhura me to;

c. nuk mund të jenë anëtarë të partive politike dhe nuk mund të marrin pjesë në veprimtaritë e tyre;

d. nuk mund të zotërojnë në mënyrë aktive, aksione ose pjesë në kapital të një shoqërie tregtare, të çdo forme.

2. Sekretari i Përgjithshëm, Drejtori i Menaxhimit të Çështjeve dhe Marrëdhënieve me Median dhe Publikun, Drejtori Ekonomik dhe i Shërbimeve Mbështetëse:

a. nuk mund të ushtrojnë asnjë funksion tjetër publik;

b. nuk mund të ushtrojnë asnjë veprimtari tjetër fitimprurëse, me përjashtim të mësimdhënies;

c. nuk mund të jenë anëtarë të partive politike dhe nuk mund të marrin pjesë në veprimtaritë e tyre;

d. nuk mund të ketë interesa privatë të drejtpërdrejtë ose të tërthortë, të përcaktuar në nenin 5, të ligjit nr. 9367/2005, që ndikojnë, mund të ndikojnë ose duket sikur ndikojnë në kryerjen në mënyrë të padrejtë të detyrave dhe përgjegjësisive të tij publike.

3. Çdo person, i cili ka informacion mbi ekzistencën e shkaqeve të konfliktit të interesit të përmendur në pikën 1 të këtij neni, njofton menjëherë me shkrim trupin gjykues, i cili ia përcjell kërkesën për vendim një trupi tjetër gjykues, të caktuar me short.

Neni 19

Ndalimi i marrjes së dhuratave, favoreve, premtimeve ose trajtimeve preferenciale

1. Është e ndaluar që një zyrtar në KPK-së të kërkojë, të pranojë ose të marrë, në mënyrë të drejtpërdrejtë apo të tërthortë, për veten, për familjen, të afërmit, dhurata, favore, premtime ose trajtime preferenciale, të cilat i jepen për shkak të pozicionit të tij, nga një individ, person fizik ose juridik privat, nga subjekte të deklarimit të interesave private periodike në ILDKPKI, kur kjo mund të shkaktojë lindjen e një konflikti interesi të çdo lloji, ose që ndikon ose duket sikur ndikon në paanshmërinë e kryerjes së detyrës a është ose duket sikur është shpërblim për mënyrën e kryerjes së detyrës zyrtare.

a. sipas kësaj rregulloreje “dhurata” ka të njëjtin kuptim të përcaktuar në ligjin nr. 9367/2005, dhe në Vendimin e Këshillit të Ministrave nr. 714, datë 22.10.2004 (VKM nr. 714/2004);

b. nuk konsiderohen si dhurata, në kuptim të këtij neni, dhuratat, të cilat i ofrohen zyrtarit si pasojë e lidhjeve fafëfisnore apo njohjeve personale që ai ka me dhuruesit, si dhe në rastin kur është e qartë se dhurata nuk ka asnjë lidhje me pozicionin dhe cilësinë si nëpunës i administratës publike, të personit që merr dhuratën.

2. Zyrtari nuk duhet që në mënyrë të drejtpërdrejtë ose të tërthortë, të japë dhurata ose të ndërmjetësojë për të dhënë dhurata për një zyrtar të një niveli më të lartë apo të afërm të tij dhe as të kërkojë ose të pranojë dhurata nga zyrtarë të një niveli më të ulët ose të afërm të tij, për shkak të cilësive dhe raporteve zyrtare.

3. Rregullat e mësipërme nuk zbatohen në rastin e ftesave të zakonshme apo kur janë të ftuar punonjës ose kolegë të tjerë, të mikpritjes tradicionale, dhuratave me vlerë simbolike apo tradicionale dhe të mirësjelljes, brenda kufijve normalë të traditës, zakoneve dhe praktikës së përditshme, të cilat nuk krijojnë dyshime për paanësinë e nëpunësit.

4. Pranimi dhe vlerësimi i dhuratave bëhet sipas rregullave të përcaktuara në nenin 23 të ligjit nr. 9367/2005 dhe në VKM-në nr. 714/2004.

5. Në asnjë rast zyrtari i KPK-së nuk duhet të pranojë dhurata në vlerë monetare.

6. Përjashtohen vetëm rastet e përcaktuara me akte të organeve kompetente, të cilat lejojnë pranimin e dhuratave apo trajtimeve preferenciale për arsye protokollare.

Neni 20

Prania dhe kufizimi i interesave private të personave të lidhur me zyrtarin

1. Person i lidhur me zyrtarin e KPK-së, për kufizimet e interesave privatë të zyrtarëve, të përcaktuar në nenet 18 e 19 të kësaj rregulloreje janë përkatësisht:

a. bashkëshorti/ja, bashkëjetuesi/ja fëmijët në moshë madhore, prindërit e zyrtarit dhe të bashkëshortit/es, bashkëjetuesit/ja;

b. çdo person fizik ose juridik, i cili, në lidhje me dhuratën, favorin, premtimin ose trajtimin preferencial, luan rolin e ndërmjetësit a të shkëmbyesit të interesave të lindur nga ky veprim.

2. Ndalimet dhe kufizimet për zyrtarin e KPK-së, të përcaktuara në këtë rregullore, zbatohen edhe për personat e lidhur me të, në përputhje me pikën 1 të këtij neni.

3. Për sa i përket kufijve të zotërimit të aksioneve ose të pjesëve në kapital, për zyrtarin e KPK-së dhe personin e lidhur me të, zbatohen drejtpërdrejt parashikimet e pikave 4 dhe 5, të nenit 24, dhe të pikave 2 e 3, të nenit 35, të ligjit nr. 9367/2005.

4. Personi i lidhur me zyrtarin nuk mund të ushtrojë veprimtari si person fizik tregtar ose ortakëri personash fizikë tregtarë të çdo forme, nëse veprimtaria përputhet ose pritet me sferën e juridiksionit të zyrtarit dhe të kompetencës së tij për të vepruar, me akte individuale apo normative të nxjerra nga ai, ose kur zyrtari ka rol thelbësor dhe përcaktues në nxjerrjen e këtyre akteve, të cilat krijojnë pasoja juridike, përfitime ose kosto mbi këtë person fizik apo mbi shoqëri tregtare e persona të tjerë fizikë, që bashkëpunojnë ose konkurrojnë me personin e lidhur.

Kjo pikë nuk zbatohet kur plotësohet një nga kushtet e mëposhtme:

a) mjeti i vetëm, me të cilin ky zyrtar mund të krijojë efektet e mësipërme, është një ligj ose një vendim i këshillit të bashkisë, komunës ose qarkut ose një vendim gjyqësor;

b) veprimtaria dhe/ose disa veprimtari tregtare së bashku të një personi të lidhur krijojnë një të ardhur të përgjithshme bruto vjetore që nuk tejkalon kufirin prej 10 milionë lekësh.

Neni 21

Mënyrat e trajtimit dhe të zgjidhjes së konfliktit të interesave

Mënyrat e trajtimit dhe të zgjidhjes së konfliktit të interesave për zyrtarët/punonjësit e KPK-së bëhen sipas kreut IV, të ligjit nr. 9367/2005.

Neni 22

Ndalimi i shpërdorimit të së drejtës

1. Asnjëra nga dispozitat e kësaj rregulloreje nuk mund të interpretohet sikur i jep zyrtarëve të KPK-së të drejta që të ndërmarrin ndonjë veprimtari, ose të kryejnë ndonjë akt që synon cenimin e parashikimeve dhe rregullave të përcaktuara në ligjin nr. 9367/2005 dhe në nenin 27, të ligjit nr. 84/2016 dhe në këtë rregullore.

2. Në mungesë të parashikimeve të veçanta në këtë rregullore, zbatohen drejtpërdrejt dispozitat e përcaktuara në ligjin nr. 9367/2005 dhe në nenin 27, të ligjit nr. 84/2016.

3. Për zbatimin e kësaj Rregulloreje ngarkohen zyrtarët dhe Autoriteti Përgjegjës i KPK-së.

Neni 23
Hyrja në fuqi

Kjo rregullore hyn në fuqi menjëherë.

Miratuar me vendimin nr. 67, datë 18.11.2019, të Komisionit.

